

ماريّة

وتقولين.. نسيّتها..

كانت ذكرى عاديه

نسيّتها؟

نسيّتي شلون.. يوم جيّتي..

قبل ماتجين.. بشويه؟

جيّتي حلم

سألنا شيخ

قال:هالحلم تفسيره..

لي واضح

باكر راح.. تجيكم بنت

فرحت وقلت:

عساها فالنا الطيّب

ولحظتنا النداويه

... سكتّي شوي وقلتيلي:

تصدق عاد..

..نفس الحلم..أنا شفّته

قبل لا نلتقي بسنين

وقالوا:.... هذي ماريّه

قلت شلون؟

قالوا بكره بتعرفين.

لما الشمس..

تاخذ وجهها بنيّه

حتى أذكرك قلتي .. هذاك اليوم..

إذا حنا تزوّجنا..

وجتنا بنت

نسّمّي البنت... ماريّه .

ضحكنا حيل ليلتها..

وليلتها..

كانت واقفه الساعه

على ثنتين ونص.. شمعته..

في ذيك الزاويه البيضاء..

مابين النيه..والنيه

نسيّتي الحلم

ونسيّتي بنتنا اللي ما.. بعد شفناها:

ماريّه

نسيّتي حلمنا اللي من قبل لانتقي..

شفناه..

وسمّينا..

ولبسناه.. بيدينا..

ملامح وجهه..

ثوب العيد..

وحطينا بمخابي الثوب..

قصيد.. وصبح..

وعيديه

نسيّتي شلون... ماريّه ؟

قعدنا حنا طول الليل

نرسم لون شفايفها

طريقة لفظها لل.... سين

ومشيّتها..

ولا جينا نصّحّيا..

تروح للمدرسه..

وحتى..

أنا ويّاك..تخيّلنا..

شلون بيكون: مريول الثانويّه

نسيّتي شلون.. ماريّه ؟

نسيّتي شلون ..إن إنتي ..

كنتي الحلم

واللي من قبل لاتجين

حلمنا فيه

وفسرناه

وعزّ الصيف.. كان بيديّنا..

وسميّه

شلون ماريه صارت بين..

لحظه..ولحظه..

منسيّه؟

وذكرى تافهه بالحيل..

وعاديّه؟

مسفر الدوسري